



Peter Olsen  
Inatsisartunut ilaasortaq

## Tjenestemandit pillugit § 37 naapertorlugu apeqqut 074/2024-mut akissut

Brevdato: 31-05-2024  
Sagsnr.: 2024-8849

Matumuuna § 37 naapertorlugu apeqqummut qulaani taaneqartumut akissut nassiunneqarpoq.

P. O. Box 1037  
3900 Nuuk

Tel. (+299) 34 50 00

Fax (+299) 34 63 50

E-mail: oed@nanoq.gl

www.naalakkersuisut.gl

### **1. Qallunaat nunaanni Tjenestemandit soraarnerussutisiallit 2019-miit 1. oktober 2023 tikillugu soraarnerussutisiaat qulingiluariatutik qaffapput. Nunatsinni tjenestemandit soraarnerussutisiassa 2019-imiilli sulii maannamut qaffaavigineqanngillat. Naalakkersuisut nassuiarsinnaanerpaat tamanna sumik peqquteqarnersoq?**

Nunami maani tjenestemandit soraarnerussutisiaat Kalaallit Nunaanni Namminersornerullutik Oqartussani kommuninilu tjenestemandit pillugu Inatsisartut inatsisissaat nr. 21, 18. december 2003-meersumi § 55 naapertorlugu tunniunneqartarpoq. Aalajangersagaq ima oqaasertaqarpoq:

*”§ 55. Tjenestemandit naalagaaffiup Kalaallit Nunaanni tjenestemandiisa soraarnerussutisiaqartitaanerit pillugu malittarisassat sukkulluunniit atuuttut malillugit soraarnerussutisiaqartinneqassapput. Imm. 2. Naalakkersuisut naalagaaffik isumaqatigiissuteqarfigisinnaavaat, taannalu malillugu tjenestemandit inatsit manna aamma tjenestemandit Inatsisartut suliffeqarfiutaanni atorfeqartitaasut pillugit Inatsisartut inatsisaat tunngavigalugit atorfinitsitaasut soraarnerussutisiassa naatsorsortassallugit tunniuttassallugillu.”*

Naalagaaffimmi tjenestemandit il.il. Kalaallit Nunaanniittut suliiunnaarnersiuteqartarnerat pillugu inatsimmik nalunaarummi 18. maj 2017-meersumi § 3, imm. 1 aamma § 5 naapertorlugu soraarnerussutisiaat ima naatsorsorneqartarput:

*” § 3. Tjenestemandip suliiunnaarnersiaqalersinnaanermut ukioqqortussusia tassaavoq ukiut tjenestemandit suliffigisimasaasa amerlassusiat:*

- 1) naalagaaffimmi tjenestemandiusutut Kalaallit Nunaanni, imaluunniit*
- 2) naalagaaffimmi tjenestemandit Kalaallit Nunaanniittut pillugit inatsimmi § 32 naapertorlugu aningaasanik tapisiaqarnissamut pisinnaatitaasimasutut, imaluunniit*
- 3) Namminersornerullutik Oqartussani tjenestemandiusimasutut, naalagaaffiup § 24 a naapertorlugu suliiunnaarnersiutit naatsorsorpagit akilerlugillu, imaluunniit*

4) Kalaallit Nunaanni kommunimi tjenestemandiusimaguni, naalagaaffiup § 24 a naapertorlugu suliunnaarnersiutit naatsorsorpagit akilerlugillu.

§ 5. Nammineq suliunnaarnersiutisiassat tassaapput ukioqqortussutsimi suliunnaarfiusumi ukiut tamaasa tunngaviusumik aningaasat 66 kr. aamma aningaasat akissarsianit suliunnaarnersiutisiassartalinnit procentit makku:

Aningaasat 24.000 kr. angullugit, 1,5 pct. aamma aningaasat 24.001 kr. aallarnerfigalugit, 1,2pct. Suliunnaarnersiutit ukiuni 37-ni ukioqqortussuseq tunngavigalugu suliunnaarnersiutit nalingat qaangersimasinnaangilaat.”

Taamaalilluni tjenestemandit soraarnerussutisiaat tjenestemandimit tjenestemandimut assigiinngitsuusarput. Soraarinnigornermi ukiut aningaasarsiallu inissisimaffiat (løntrin/skalatrin(aningaasarsiatigut isertitat soraarnerussutisiaqaataasut)) soraarinnigornermi inissisimaffigisat, soraarnerussutisiaat annertussusaannut aalajangiisuusarput. Tamatuma tjenestemandinut soraarnerussutisiaat, tjenestemandit aningaasarsiaasa ineriartornerannut malinnittuunerat nassataraa.

Kalaallit Nunaannili Danmarkimilu tjenestemandit aningaasarsiaat assigiinngillat, taamaammallu Danmarkimi tjenestemandit soraarnerit Kalaallit Nunaanni tjenestemanditut soraarnertulli assigiimmik soraarnerussutisiaqarneq ajorput. Taamattaarlu Kalaallit Nunaanni Danmarkimilu tjenestemandit soraarnerussutisiaat assigiinngitsumik ineriartortarput (manna pillugu apeqqut nr. 5 ataaniittoq takuuk).

Tjenestemandi soraarinnigoraangami Kalaallillu Nunaanni najugaqarluni, qallunaat oqartussaqaarfiat "Udbetaling Danmark" sinnerlugu Aningaasaqarnermut Sulisoqarnermullu Aqutsisoqarfiup (ASA) tjenestemandip soraarnerussutisiai tunniuttarpei. Kalaallilli Nunaanni tjenestemandit soraarnerussutisiaasa nalimmassarnerat Kalaallit Nunaanni tjenestemandit naalagaaffimmi, namminersorlutik oqartussani kommuninilu atorfeqartunut isumaqatiginninniarnerat naammassippata aatsaat pisinnaavoq. Isumaqatiginninniarnelit sivitsoruttoorneranni nalimmassaatit sivitsoruttoortarput. Taamaalillunilu Kalaallit Nunaanni tjenestemandit naalagaaffimmi atorfeqartut pillugit isumaqatiginninniarnelit sivitsoruttoorpoq. Taakku assersuutigalugu tassaapput pinerluuteqarsimanerme isumaginnittoqarfimmi politiinilu sulisut. Isumaqatiginninniarnelit taakku namminersorlutik oqartussanit ingerlanneqarnatik Danmarkimi finansministereqarfimmit ingerlanneqarnerat eqqumaffigissallugu pingaaruteqarpoq. Aningaasaqarnermut Sulisoqarnermullu Aqutsisoqarfiup tjenestemandinut soraarnerussutisianut nalimmassaatit aningaasartaat tiguniarlugit, tjenestemandinut soraarnerussutisiaat kingumoortumik piffissamullu isumaqatiginninniarnifigineqartumut siumoortumik nalimmassaavigineqassapput.

Tjenestemandinut tunngasut isumaqatiginninniarnelit kingullermik nalimmassaasoqarnerata kingorna tjenestemandinut namminersorlutik oqartussani kommuninilu atorfeqartunut ingerlaavartumik naammassillugit isumaqatiginninniutigineqartarput. Taamaalillutillu danskit isumaqatiginninniarneri kisimik inaarneqarnissaat utaqqineqarput. Kingorna tjenestemandit soraarnerussutaanut aningaasartat nutaat naatsorsorneqarnerat aningaasaqarnermut sulisoqarnermullu aqutsisoqarfiup utaqqissavaa.



Aallaavittut Naalakkersuisut aningaasarsianik atorfeqartitaanermullu atugassarititanik isumaqatiginninniarnernut politikikkut akulerussinnaanngillat, taakkumi sulisartoqarnermi illuatungeriinniipput. Taamaattoq Inatsisit atuutsinneqarnerannut Naalakkersuisoq 2021-mi pinerluttunut isumaginnittoqarfimmi inissiisarfinni sulisut naligiimmik akissarsiaqarallartinneqarnerannik siusinnerusukkut isumaqatigiissutaasimasup atuuttuaannalersinnissaa / sivitsorneqarnissaa pillugu taamanikkut Justitsiministeriusumut Niels Hækkerupip oqaaseqarneranut tapersiivoq. Isuma tamanna Naalakkersuisunit 2022-mi uppersarsarneqaqqippoq. Taanna uani takuuk: <https://www.ft.dk/samling/20222/almde/GRU/bilag/23/2669620.pdf>

Danmarkimi tjenestemandinut soraarnerussutisiat nalimmassarnerisa amerlassusaat pillugu apeqqummut tunngatillugu, Folketingip Kalaallit Nunaannut Ataatsimiititaliaata apeqqutaanut nr. 24-p (immikk. nal.) ulloq 7. februar 2023 akissut innersuussutigineqarpoq. Taanna linkimi uani takuneqarsinnaavoq: <https://www.ft.dk/samling/20222/almde/gru/spm/24/svar/1936386/2671834/index.htm>

Danskit finansministeriat ilaatigut akissummini imaattunik paasissutissiivoq:

”Danskit soraarnerussutisiaanni aningaasartat piffissani isumaqatiginninniarnerni isumaqatigiissuteqarfigisani tjenestemandinut aningaasarsiat nalimmassarneqarnerisa atugassanngortinnissaannut isumaqatigiissutaasunik nalimmassarneqartarput. *Kingullermik isumaqatigiissummi 2021-meersumi ukiuni isumaqatigiissuteqarfiusuni pingasuni aningaasarsiat arfinileriarlugit nalimmassaaviginissaat isumaqatigiissutigineqarpoq.*”

§ 37 naapertorlugu apeqqut nr. 108-2023-mut akissut innersuussutigineqarpoq.

§ 37 naapertorlugu apeqqummut akissut matumunnga akissummut ilanngussatut ilanngunneqarpoq.

**2. Nunatsinni tjenestemandip soraarnerussutisiassai qallunaat nunaanni najugaqartuminngaaniit annikinnerujussuupput Naalakkersuisut nassuiarsinnaanerpaat tamanna sumik peqquteqarnerisq?**

Siusinnerusukkut § 37 naapertorlugu apeqqut nr. 108-2023-mut akissut innersuussutigissavara. § 37 naapertorlugu apeqqummut akissut matumunnga akissummut ilanngussatut ilanngunneqarpoq.

Tamatuma saniatigut apeqqutinut 1-imut aamma 5-imut akissut innersuussutigissavakka.

**3. Nunatsinni tjenestemandip soraarnerussutisiarisartagai qallunaat nunaannitulli assigiisilerneqarnissaannik Naalakkersuisut suliniuteqarpat? A. Naamiuppat sumik tamanna peqquteqarpa?**

Siusinnerusukkut § 37 naapertorlugu apeqqut nr. 108-2023-mut akissut innersuussutigissavara kiisalu apeqqut 5-imut uani akissutigineqartoq aamma innersuussutigissavara.

§ 37 naapertorlugu apeqqummut akissut matumunnga akissummut ilanngussatut ilanngunneqarpoq.

#### **4. Nunatsinni tjestemandip soraarnerussutisariartagai qallunaat nunaannitulli assigiilersinneqassagaluarpata tamanna aningaasatigut qanoq naleqassava?**

##### **A. Aamma kia tamanna aningaasartuutigissavaa?**

Tjestemandit aningaasarsiaasa, tjestemandinut soraarnerussutisianut tunuliaqutaasut qaffanneranni, aningaasarsiat qaffariaataat sulisitsisumit nammanneqartarpoq – tassa kommuninnit Namminersorlutillu Oqartussanit<sup>1</sup>. Tjestemandit soraarnerussutisiaasa qaffariaataat aningaasaqarnermut sulisoqarnermullu aqutsisoqarfiup "Udbetaling Danmark" sinnerlugu akilissavaa. Soraarnerussutisiali qaffariaataat sulisitsisut akiliutaannit aningaasalersorneqassaaq, tassa kommuninit namminersorlutillu oqartussanit.

Taamaalilluni aningaasartuut tamarmiusoq akileraarutinit matussusigaassaaq, Nunattalu karsianut kommuninilu inississalluni.

Tjestemandit Danmarkimi najugallit tjestemandillu Kalaallit Nunaanni najugallit tamakkiisumik sanillersuukkumallugit, aningaasarsiat inissisimaffiitut atorfeqarnerillu sivisussusaat tamakkerlugit skalatrinit tamaasa naatsorsorneqaaqqaartariaqassapput / qulaajaavigineqaaqqaartariaqassapput. Tamatuma assersuutigalugu ilinniartitsisunut aningaasarsiat inissisimaffii piusut tamaasa, ukiullu suliffiusinnaasut tamaasa naatsorsuusiorfigineqartariaqarnerat nassatarissavaa. Naatsorsuusiaq taanna tjestemandinut assigiinngitsunik atorfilinnut tamanut, soorlu perorsaasunut, ilinniartitsisunut, inatsisilerituunut, allaffimmiunut, palasinut il.il. aamma naatsorsuusiorfigineqartariaqassaaq.

Misissoqgissaakkamik/naatsorsukkamik annertuumik taamaattumik pigisaqartoqanngilaq, taamaammallu taamatut nalimmassaanerup qanoq akeqanrissaa Naalackersuisut paasissutissiissutigisinnaanngilaat. Matumanili suliat *annertoorujussuit* pineqassapput, taakkulu Naalackersuisut isumalluutaasa avataanniipput, taamatullu aamma § 37 naapertorlugu apeqqutinut suliassat sinaakkutaasa avataanniillutik.

Tamatuma saniatigut § 37 naapertorlugu apeqqut nr. 108-2023-mut apeqqut 2-mut akissut innersuusutigineqarpoq, tassanilu ima allassimasoqarpoq:

” Kalaallit Nunaanni aamma Danmarkimi atorfillit soraarnerussutisiaannik naleqqussaasoqassappat, ataasiakkaat akissarsiaasa qaffasissusaannik naleqqussaasoqartariaqassaaq. Tamanna isumaqarpoq Kalaallit Nunaanni atorfillit akissarsiai maanna Danmarkimi akissarsiaattut annertutigilertussaasariaqartut, kiisalu Danmarkimi akissarsiat qaffakkaangata Kalaallit Nunaanni akissarsiat aamma qaffaqqittariaqartassapput. Tamanna isumaqarpoq , nammineq suliffeqarfeqarfitta peqataasui ilaatigut isumaqatiginninniarsinnaanerat atorunnaassasoq Namminersorlutillu Oqartussat akit suliffeqarfeqarfiillu ineriartorneri Kalaallit Nunaata avataaniittut tunngavigisariaqassallugit. Tamatuma saniatigut atorfillit akissarsiai isumaqatigiissutit naapertorlugit

<sup>1</sup> Akissummi Kalaallit Nunaanni tjestemandit naalagaaffimmi atorfeqartut ilaatinneqanngillat.



atorfillit akissarsiaannut attuumapput, taamaammallu pisortani atorfillit katillugit akissarsiai qaffassasut naatsorsuutigineqarsinnaalluni Akissarsiat taamatut qaffanneri namminersorlutik akissarsiaannut nanertuittisinnapput. Ataatsimut isigalugu, Kalaallit Nunaata avataani pissutsit naapertorlugit akissarsianik qaffaanerit, ataatsimut inuiaqatigiit aningaasaqarnerannut ajortumik kinguneqarsinnaapput.

Erseqqissarneqassaaq aamma, atorfillit akissarsiai illuatungeriit naligiit akornanni isumaqatigiissutiginiarneqartarmata. Taamaammat naatsorsuutigineqartariaqarpoq, Naalakkersuisut illuatungersiortumik atorfillit akissarsiaannik isumaqatiginninniartalerpata, ataatsimut isumaqatiginninniarnermi aaqqissuussamut ajortumik kinguneqassasoq.”

## **5. Assigiinngisitsineq qulaani pineqartoq inatsisinit imaluunniit nalunaarummit tunngaveqarsimappat, taava inatsit nalunaarulluunniit suna allanngortariaqarnerisooq Naalakkersuisut nassuiarsinnaanerpaat?**

Aallaqqaasiullugu Naalagaaffimmi tjenestemandit il.il. Kalaallit Nunaanniittut suliunnaarnersiuteqartarnerat pillugu inatsimmut nalunaarut 18. maj 2017-imeersumi § 31 innersuussutigineqarpoq. Aalajangersagaq ima oqaasertaqarpoq:

” § 31. Tjenestemandi kap. 1 naapertorlugu suliunnaarnersiutitalimmik suliunnaarsitaanermi kingorna Kalaallit Nunaanniunngitsoq najugassikkuni, pisinnaatitaavoq nunami maani tjenestemandit suliunnaarnersiutit pillugit inatsimmi malittarisassat naapertorlugit pissarsiarisimasinnaasami annertoqataannik suliunnaarnersiutinik tunineqassalluni. Taamattaaq pineqassapput aapparisaq qitornallu toqukkut qimatat. Suliunnaarnersiutinik naatsorsuineqassaaq inatsit manna naapertorlugu suliunnaarnissamut ukioqqortussuseq tunngavigalugu.”

Tjenestemandinut Kalaallit Nunaannit Danmarkimut nuuttunut soraarnerussutisiatut tunniunneqartut, danskit aningaasartaliussaata malillugit akilernerneqartassasut aalajangersakkami aalajangersarneqarpoq. Aalajangersagaq taamaalilluni Kalaallit Nunaanni Danmarkimilu tjenestemandinut soraarnerussutit assigiinngissinnaanerannik takutitsivoq.

Tjenestemandeqarnerup oqaluttuarisaanikkut ineriartorsimanerata saniatigut inatsisit atuussimasut atuuttullu ippat. Siuliani apeqqut 1-4-mi akissutini atuarneqarsinnaasutut, soraarnerussutisiat piffissami aalajangersimasumi aningaasarsiatigut atugassarineqartunik toqqammaveqarput, taamaammallu tamanna aamma suliffeqarnermi illuatungeriit isumaqatigiissutaannut attuumassuteqarluni. Taamaalilluni Kalaallit Nunaanni Danmarkimilu tjenestemandit soraarnerussutisiaasa assigiiaarnissaannik piumasaqaat kisiat toqqammavigalugu inatsimmik allannguinissaq pisinnaasorinaranilu naapertuussorinangilaq.

§ 37 naapertorlugu apeqqut nr. 108-2023-mut akissummi oqaatigineqartutut pisortat aningaasatigut iliuuserisinnaasaasa iluanni nunatsinni soraarnerussutisiaqartortatsinnut pissutsit qissimigaarneqarsinnaanerata allatut periarfissaavoq, tassani utoqqalinermi soraarnerussutisiat, ineqarnermut tapiissutit, akileraartarnermi pissutsit il.il.

## 6. Naalackersuisut allamik sammisaq pillugu oqaasissaqarnerpat?

Tjenestemandinut immikkoortup qulaajaavigineqarnissaanik kissaat paasisinnaaqaara, tassani sooq tjenestemandinut soraarnerussutisariatitatta ullumikkut innerannut oqaluttuarisaanermi immikkut patsit ilanngullugit.

Aningaasaqarnermut Akileraartarnermullu Naalackersuisoqarfik maannakkorpiaq tjenestemandinut aqqissuussinitta ilusilersorneqarneranut oqaluttuarisaanermi patsisaasorpiaat pillugit nalunaarusiorsinnaanermik periarfissanik misissuina paasissutissiissutigissavara. Aqqissuussaaneq Kalaallit Nunatsinni politikikkut aalajangikkanik takutisisuinnaangilaq, aammali qanga danskit naalagaaffiata kisimi Kalaallit Nunatsinni tjenestemandinik atorfinitsitsisartuunerata nalaani tjenestemandertatta pisinnaatitaaffinnik nassataannik takutisisuuvoq.

Taamaattoqassappat qulaajaaneq tjenestemandinut immikkoortumi allaffissornikkut periutsit saniatigut, danskit kalaallillu inatsisaannik misissuisussap pisariaqarnera ilimagineqartariaqassaaq. Taakku siusinnerusumut maannakkullu atuunnerat ilanngullugu. Taamatut misissuinerup avataanit ikiorserneqarnissat pisariaqalersissagaa ilimagineqarpoq. Taamaammallu tamatumunnga periarfissat misissorneqaleruttorput.

Inussiarnersumik inuulluaqqusillunga



Erik Jensen